



23. februar 2023

UPA 2023/162

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Qanoq iliornikkut nunatsinni ujarak sanaartornermi atorluarnerusinnaavarput, qisunnullu eqqussuiuarnerup annertoqisup apparsarnissaa anguniarlugu apeqquteqaat aallaavigalugu oqallisissiatut siunnersuut

(Inatsisartunut ilaasortaq, Aqqalu C. Jerimiassen, Atassut)

Nunat orpeqarfiulluartut tikittaraagut, illui tamapajaamik qisunnit sanaajunngitsut, nunalu orpeqanngitsoq tikittuartaarput angerlaraangatta, qisuinnaavissuarnik illutalik.

Aallartiinnarlunga oqarsinnaalereerunarpunga, aallarniutaasup ersersippaalusooq, soorluuna ila arlaannik ataqatigiinngitsoqartoq tassani.

Irland qeqertaarsuuvoq, nunatsinnullu sanilliullugu nunatakinneralaarsuuvoq. Taamaattoq nunaminni pissarititaasut atorluartorsuaat. Nammineq uanga 2004-mi oqaatsinik pikkorissarlunga Irland-imi Dublin-imiinnikuuvunga, tassanilu maluginiarluarsimaqaara, illut takusakka tamarluinnapajaamik qisummik sanaajunnginneri, naak illoqarfiit iluini allat orpinnik ulikkaaraluarlutik.

Uagummiuna taava sooq, issittormiusugut kujataani suami suami orpeqarsinnapajuttumi avataaniit eqqussaniik, inoqarfiit tamarluinnasa takugutsigit, illut qammakkat akuttuneqqisaattutulluunniit ittartummita? Akissaq immaqa tassani eqqaaneqakkajuttarpoq? akisuallaartunngooq taamak ittut sananissai, kisiannili illuani qiviarneqanngitsoq tassajunnarsivoq, akisussusaanut naleqqiullugu attartussutsimigummita qanoq akilersinnaanerutigissangaluarpa siunissami aaqqissueqattaarnissat eqqarsaatingalugit?

Ilulissat avataata tungaani erngup nukiganik nukissiorfimmiit Paakitsumiit, sarfamik sippoqartarnera takornartaanngilaq, taannalu nukissaq minguitsoq atorluarlugu qaarsortatsinnik killuisinnaanerup misissorneqarsinnaanissaa ila soorlu ajornassanngikkaluartoq, nunajaqqani Irland-ikkunni ajornanngippat.

Immaqa soqutiginaruusinnaangaluarpoq, suliassaq ima ittoq Sisimiuni sanaartornermut ilinniarfimmiluunniit immikkut projektitut angisuutut suliakkiullugu, soorlu USA-mi universitetinut tamanna naalagaaffianiit atorneqartareersoq.

Issittumi ingenørit paasisaat malinnaaffigitigit, tusarnaartigit illuliornermi sanaartugassat pisinnaasaat periarfissallu suunersut paasiniaaffigitigit. Innersuussutaallu atorluarlugit piujuartitsinikkut, avatangiisinut sunniutaat, issittumi suut naleqquttuunersut kiisalu qanoq iliornikkut akilersinnaasumik atorneqarsinnaaneri tusarnaartigit.



Nunatsinni sanaartortarnikkut eqqarsariutsip nutarsarneqarsinnaanissaa siunissaq aggersoq eqqarsaatingalugu apeqquteqaat aallaavigalugu oqalliseqatiseraassi.

Oqallilluarisi.